

ՎԱՀԱՆ ՏԵՐ-ՂԵՎՈՆԴՅԱՆ

պարսկական գիր. թեկնածու, ՄՄ

ԳԱԳԻԿ ԴԱՆԻԵԼՅԱՆ

պարսկական գիր. թեկնածու, ՄՄ

**ԿԻԼԻԿՅԱՆ ՀԱՅԱՍՏԱՆԻ ՏԱՐԱԾՔԱՅԻՆ ՁԵՈՔԲԵՐՈՒՄՆԵՐԸ
ՀՈՒԼԱՂՈՒԻ 1260 Թ. ԱՍՈՐԻՔՅԱՆ ԱՐՇԱՎԱՆՔԻՅ ՀԵՏՈ**

ԺԳ. Դարի կեսերը բախտորոշ ժամանակաշրջան էին Կիլիկիայի հայոց թագավորության համար: Սա կապված էր հիմնականում դեպի Առաջավոր Ասիա եւ Մերձավոր Արեւելք մոնղոլների հաղթական շարժի եւ տարածաշրջանում ձեւավորված նոր աշխարհաքաղաքական իրադրության հետ: Հեթում արքայի (1226-1269 թթ.) դիվանագիտական հեռատեսությունը թույլ տվեց խուսափել նոր նվաճողների հետ բախումից եւ երկիրը զերծ պահել նրանց ավերիչ ներխուժումից: Հատկանշական է, որ մինչեւ մոնղոլների հայտնվելը հայոց թագավորությունը գտնվում էր Ռումի կամ Իկոնիայի սելջուկյան սուլթանության գերիշխանության ներքո¹: Սակայն երբ 1243 թ. Քյոսեղաղի (Չմանկատուկի)

¹ Սրա համար հիմք է տալիս առկա դրամագիտական նյութը, քանզի հայտնի է, որ Ալաալ-Դին Քայկուբադ (կառ. 1220-1237 թթ.) եւ Ղիյաս ալ-Դին Քայխուսրով (1237-1246 թթ.) սուլթանների օրոք հատվել են հայ-սելջուկյան երկկեզվյան դրամներ, որոնց մի երեսին դրոշմված է «Հեթում թագաւոր հայոց», իսկ դարձերեսին՝ հիշյալ սուլթանների անունների արաբատառ մակագրություններն են: Տե՛ս P. Z. Bedoukian, *Coinage of Cilician Armenia* (Revised edition), Danbury, Connecticut, 1979, p. 227-235: Միջնադարյան աղբյուրներում Իկոնիայի սուլթանությանը հայոց թագավորության հարկ վճարելու մասին վկայություններ չգտնելով՝ որոշ հետազոտողներ կարծիք են հայտնել, որ այդ դրամները կտրվել են առևտրատնտեսական նպատակներով (Պ. Սապապաղեան, Հեթում Ա-ի Հեթում-Ջապել եւ երկկեզուեան դրամներու մասին, ՀՀՀՄ, Ը., Պէյրուք, 1980, էջ 233-248), սակայն ամենատարածված տեսակետն այն է, որ Հեթումը դրանք հատել է ի նշան իր հնազանդության, որը, հավանաբար, ձեական քնույթ էր կրում: Տե՛ս P. Bedoukian, *Coinage*, p. 84: Հմմտ. Cl. Cahen, *La Turquie pré-ottomane* (Varia Turcica VII), Institut Français d'Études Anatoliennes, Istanbul, 1988, p. 88-89: Տե՛ս նաև Y. T. Nercessian, *Attribution and Dating of Armenian Bilingual Trams*, Armenian Numismatic Society, Special Publication № 2, Los Angeles, 1983: Հմմտ. A. D. Stewart, *The Armenian Kingdom and the Mamluks: War and Diplomacy during the Reigns of He'tum II (1289-1307)*, Brill, Leiden, 2001, p. 43-44, n. 2. Լ. Տեր-Պետրոսյան, Խաչակիրները եւ հայերը, Կ. Բ., Պատմա-քաղաքագիտական հետազոտություն (Հայկա-

ճակատամարտում կրած ծանր պարտությունից հետո մոնղոլներին հնազանդվեցին նաեւ Ռումի սելջուկները, վտանգը շատ մոտ էր եւ, հետեւաբար, միջազգային դիվանագիտական նոր հայեցակարգի որդեգրումը օրապահանջ դարձավ նաեւ Կիլիկյան Հայաստանի համար: Ձեւավորված քաղաքական պայմաններում երկրի ռազմավարչական վերնախավը՝ հանձին Հեթում թագավորի, որոշում կայացրեց, մոնղոլների գերակայությունն ընդունելով, հաշտության եզրեր փնտրել նրանց հետ: Այդպես, Սմբատ Սպարապետի 1247-1248 եւ Հեթում արքայի 1254 թվականներին Կարակորում կատարած այցելություններով հայ-մոնղոլական հարաբերությունները պաշտոնական բնույթ ստացան: Հայ-մոնղոլական դաշինքի ամրագրումից հետո Կիլիկիան մոնղոլներից ռազմաքաղաքական անվտանգության երաշխիքներ ձեռք բերեց, փոխարենը՝ հուսալի հենարան դարձավ վերջիններիս՝ դեպի արեւմուտք ընդարձակվելու նկրտումներին կենսագործման համար: Հայոց պետությունը որոշ հարկային պարտավորություններ² (իր արտաքին քաղաքական շահերը Մոնղոլական տերության եւ հետո նաեւ Իլխանության քաղաքական շահերին հարմարեցնելու նպատակով) եւ նրանց ռազմական ձեռնարկումներին մասնակցելու հանձնառություն ստանձնեց, բայց, ի տարբերություն Ռումի սելջուկյան սուլթանության, պահպանեց ներքին անկախությունը եւ պետական իշխանության ինքնուրույնությունը:

Մինչեւ 1256 թ. ավարտին հասցնելով Իրանի նվաճումը՝ մոնղոլ մեծ խան Մանգուի եղբայրը՝ Հուլաղուն, փաստորեն հիմքը դրեց մի նոր մոնղոլական պետական կազմավորման, որին մենք այսօր Իլխանություն (1260-1335 թթ.) ենք կոչում³: 1258 թ. չեզոքացնելով Ալամուտի խամա-

կան մատենաշար Գալուստ Կիլիկյանի հիմնարկության), Երևան, 2007, էջ 299-301: Այնուամենայնիվ, մեզ հայտնի աղբյուրներից Ռումի սուլթանությանը հայոց թագավորության հարկատու լինելու մասին բազմաթիվ ակնարկներ կան հատկապես պարսկագիր Իբն Բիբի, իսկ արաբագիր հեղինակներից՝ ալ-Ումարիի աշխատություններում:

² Համդալլահ Կազվինին, ով թեւ Վերոհիշյալ դեպքերից 60-70 տարի անց է գրում, այնուամենայնիվ, արձանագրում է, որ «Փոքր Հայաստանը, որ *Իրանի մաս չի կազմում*» (ընդգծումը մերն է), որպես տարեկան հարկ ընդամենը 30 հզ. դինար էր վճարում իլխանական Իրանի գանձարան: Համեմատության համար նշենք, որ նույն հեղինակի վկայությամբ՝ Իկոնիայի սուլթանությունից գանձվում էր 3 մլն. 200 հզ. դիրհամ, իսկ Վրաց թագավորությունից 1 մլն. 200 հզ. դինար հարկ: Տե՛ս Hamd Allāh Mustawfi Qazwini, Kitāb Nuzhat al-qulūb, Baril, Laydan, 1913, §. 100, ինչպես նաև The geographical part of the Nuzhat-al-Qulūb composed by Hamd-allah Mustawfi of Qazwin in 740 (1340), tr. by G. Le Strange, Leiden-London, 1919, p. 100. Հմմտ. Գ. Գ. Микаелян, История Киликийского Армянского государства, Ереван, 1952, с. 316. Լ. Տեր-Պետրոսյան, նշվ. աշխ., էջ 311-313:

³ Գիտական գրականության մեջ Հուլաղունն եւ նրա հաջորդներին տրված ilkhān տիտղոսի մի քանի ստուգաբանություններ կան, թեւ նրանցից ամենատարածվածը «նքա-

յիլականներին եւ գրավելով Բաղդադն ու վերացնելով Աբբասյան խալիֆայությունը՝ նա արդեն պատրաստ էր ներխուժելու Ասորիք, որտեղ դեռ շարունակում էին գոյատեւել կործանված Այյուբյան դինաստիայի մնացուկները: Հուլիսի 1260 թ. ասորիքյան արշավանքի եւ դրանում Հայոց արքա Հեթումի ունեցած դերակատարության մասին մի առանձին հոդված հրապարակվել է⁴: Ծիշտ է՝ Այն Ջալուտի ճակատամարտում (1260 թ. սեպտեմբերի 3) մամլուքներից կրած պարտությամբ Հուլիսի ձախողեց Ասորիքում հաստատվելու մոնղոլների առաջին հնարավորությունը, բայց նրան հաջորդած տիրակալները բնավ չհրաժարվեցին այդ նպատակից: Հետագայում եւս՝ 1281, 1299, 1300, 1303, 1312-1313 թթ., մոնղոլ իլխանները կրկին մեծ արշավանքներ ձեռնարկեցին դեպի Ասորիք, թեեւ բոլոր այս դեպքերում, չնայած դաշնակիցներից եւ հպատակ երկրներից՝ Խաչակրաց պետություններից, Վրաստանից, Ռումի սուլթանությունից եւ հատկապես Կիլիկյան Հայաստանից, ստացած օգնությամբ եւ արձանագրած ժամանակավոր հաջողություններին՝ վերջին հաջվով պարտված դուրս եկան Մամլուքյան սուլթանության դեմ պայքարում: Ռ. Ամիտայը սրա ամենահավանական պատճառ է նշում այն, որ այս երկու տարածաշրջանային ուժերի վախճանամյա դիմակայության ընթացքում իլխանության հետ հարաբերությունները գրեթե մշտապես առաջին տեղն էին զբաղեցնում Մամլուքյան սուլթանության արտաքին քաղաքականության օրակարգում, մինչդեռ իլխանության դեպքում Սուլթանության հետ հարաբերություններից էլ ավելի կարեւոր առաջնահերթություն կար՝ Ջոջիի մոնղոլական ուլուսի կամ Ոսկե Հորդայի հետ պատերազմը կովկասյան ճակատում միանձնյա գերիշխանության հասնելու համար⁵:

Մոնղոլների հետ հաստատած դաշնակցությունը հնարավորություն տվեց Հայոց թագավորությանը որոշ տարածքային ձեռքբերումներ ունենալ եւ տիրանալ այն հողերին, որոնք մի ժամանակ Գող Վասիլին էին պատկանել⁶, իսկ այդօրեա Հալեպի Այյուբյանների տիրույթների մաս էին

կա խան» բացատրությունն է, որ շեշտում է նրանց ստորադասությունը Կարակորումում ստող Մեծ խանին: Տե՛ս Th. Allsen, *Mongol Imperialism*, Berkeley, 1987, p. 48: Հմմտ.՝ R. Amitai-Preiss, *Mongols and Mamluks: The Mamluk-Ilkhanid War, 1260-1281*, Cambridge, 1995, p. 13-14:

⁴ Տե՛ս Գ. Դանիելյան, Մամլուքյան սուլթանության և Կիլիկյան Հայաստանի հակամարտության ակունքները (արաբական աղբյուրների քննություն), ՎՀՀ, թ. 1 (49), հունվար-մարտ 2015, էջ 141-154:

⁵ Տե՛ս R. Amitai, *Holy war and rapprochement: Studies in the Relations between the Mamluk Sultanate and the Mongol Ilkhanate (1260-1335)*, Brepols, Turnhout, 2013, p. 15-16.

⁶ Տե՛ս Cl. Cahen, *La Syrie du Nord à l'époque des Croisades et la principauté franque d'Antioche*,

կազմում: Այսպես, ըստ Հեթում արքայորդու «Ճաշոց»-ի (1286 թ.) հիշատակարանի՝ «...նա (Հեթումը - Գ. Դ.) ազնուութեամբն Աստուծոյ եւ ձեռնտուութեամբ Մուղալ զաւրուն էառ զմեծն Գերմանիկէ (իմա՝ Մարաշը) եւ զՊեհեսնի»⁷:

Ըստ Իբն ալ-Շիհնայի՝ հիջրայի 656 թ. (1258 թ.) Մարաշը գտնվում էր Իմադ ալ-Դին անուանով մի կառավարչի ձեռքում, որի ընտանիքը քաղաքին տիրում էր արդեն 50 տարուց ավելի: Պատմիչը շարունակում է, որ «Իմադ ալ-Դինը աղաջիրներ (աղաչ-էրի)⁸ եւ հայերի հարձակումների հաճախացման պատճառով այլեւս անկարող էր պահել այն: Նա նամակ գրեց Ռումի տեր Իզզ ալ-Դին Քալկավուսին՝ բերդը նրան հանձնելու մտադրությամբ, բայց վերջինս հրաժարվեց: Գրեց նաեւ Ասորիքի տեր ալ-Մալիք ալ-Նասիր Սալահ ալ-Դինին, բայց վերջինս նույնպես հրաժարվեց ընդունել բերդը: Եւ երբ նրա վիճակը բարդացավ, [հարկադրված] թողեց այն եւ հեռացավ, որից հետո նրան տիրեցին հայերը»⁹:

Այն մասին, որ Հուլաղուի ասորիքյան արշավանքի արդյունքում Հեթումը տիրացել է Բեհեսնային, կամ Բեհեսնիին, արաբագիր հեղինակները նույնպես հաղորդում են, միայն թե դեպքն իրարից դուրսն-ինչ տար-

Geuthner, Paris, 1940, p. 705. S. Der-Nersessian, The Kingdom of Cilician Armenia, A History of the Crusades, vol. II: The Later Crusades 1189-1311, gen. ed. K. M. Setton, Wisconsin, 1969, p. 653. M. Canard, Le Royaume d'Arménie-Cilicie et de Mamelouks jusqu'au traité de 1285, Revue des Études Arméniennes, 1967, p. 222.

⁷ Տե՛ս Մատենադարանի ձեռ. թ. 979 («Հեթում Բ. արքայի Ճաշոց»), թերթ 475ա, ինչպես նաև Հայերեն ձեռագրերի հիշատակարաններ (հետայսու՝ ՀԶՀ), ԺԳ. դար, կազմեց Ա.Ս. Մաթևոսյան, Երևան, 1984, էջ 587: Հմմտ. Hayton, La Flor des estoires de la Terre d'Orient, Recueil des historiens des croisades. Documents arméniens, t. 2, p. 171 և Վահրամայ Բարսեղյան Ռուսաուր պատմութիւն Ռուբենեանց, ի յոյս ընծայեաց հանդերձ ծանոթութեամբ Կարապետ Վարդապետ Շահնազարեանց, Փարիզ, 1859, էջ 220: Տե՛ս նաև R. Grousset, The Empire of the Steppes, tr. from French by Naomi Walford, New Brunswick, New Jersey, 1970, p. 362. Cahen Cl., La Syrie, p. 705. Г. Г. Микаелян, История, с. 333. A. D. Stewart, Kingdom, p. 46-47, n. 10. Cl. Mutafian, L'Arménie du Levant (XIe-XIVe siècle), Tome 1, Paris, 2012, p. 149.

⁸ Բնագրում՝ *ʿağāğiriyya* (քառացի՝ «անտառի մարդիկ», «ծառերի մարդիկ»): Աղաչ-էրիները թյուրք-օղուզական ցեղախմբեր էին, որ սովորություն ունեին անտառներում քնակվել: Տե՛ս Рамид-ад-Дин, Сборник летописей, том I, книга I, пер. с персидского Л. А. Хетагурова, ред. и примечания А.А. Семенова, Москва-Ленинград, 1952, с. 85.

⁹ Տե՛ս Ibn al-Sihna, Al-Durr al-muntahab fi tāriḥ mamlakat Ḥalab, bi-taḥqīq ʿAbd Allāh Muḥammad Darwīṣ, Dār al-kitāb al-ʿarabī, Dimaṣq, 1984, §. 192: Իբն Բիբին նույնպես գրում է Մարաշի վրա աղաչ-էրիների հաճախակի հարձակումների մասին, որոնք, ըստ նրա, «ճանապարհներ և քարավաններ էին կտրում, հրոսում Ռումի երկրի, Ասորիքի և հայերի վրա»: Տե՛ս Recueil de Textes Relatifs à L'Histoire des Seldjoucides par M. Th. Houtsma, vol. III, Histoire des Seldjoucides d'Asie Mineure d'après l'abrégé du Seldjournāmeḥ d'Ibn-Bibī, Leide, 1902, §. 284: Հմմտ. Cl. Cahen, La Turquie, p. 240-241.

բերվող պատումներով են ներկայացնում: Ըստ Իզզ ալ-Դին իբն Շադդադի՝ մինչև մոնղոլների արշավանքը, Բեհսենին Հալեպի սուլթան ալ-Նասիր Յուսուֆի տիրությունից էր: Եւ երբ գրոհվել էր Ասորիքը, փորձ էր կատարվել գրավել այն, բայց տեւական պաշարման արդյունքում, այն թողնվել էր: Զորքերը առաջ էին ընթացել Հալեպի ուղղությամբ, որի առումից հետո մոնղոլները կրկին վերադարձել եւ վերսկսել էին պաշարումը առավել մեծ ուժով եւ ի վերջո գրավել: Բայց նրա բնակչությունը հրաժարվել էր «Սաի տիրոջ» հպատակությունից, ուստի այնտեղ մուսուլման կառավարիչ էր նշանակվել: Բայց որոշ ժամանակ անց բերդի բնակիչները, իրենց անվտանգ չգտալով, ի վերջո ստիպված էին եղել բերդը հանձնել հայերին¹⁰:

Իբն Շադդադի պատումին հակառակ՝ ալ-Ջազարի պատմիչը հիշրայի 692 թ. (1293 թ.) իրադարձությունների շարադրանքում, երբ խոսում է Սաի երկրի հետ կնքված հաշտության արդյունքում մամլուքներին հանձնված բերդերի (Բեհսենի, Մարաշ, Թեյ Համդուն) մասին, գրում է. «[Բեհսենան] Հալեպի տեր ալ-Մալիք ալ-Նասիր Սալահ ալ-Դին Յուսուֆի ժամանակներում, որպես իր երկրի տիրությունից մեկը, գտնվում էր նրա կառավարիչների ձեռքում: Երբ թաթարները Հալեպ եկան եւ տիրացան նրան, այնտեղի (Բեհսենայի) կառավարիչն էր էմիր Սայֆ ալ-Դին ալ-Ակրաբը, ով վաճառեց այն Սաի տիրոջը հարյուր հազար դիրհամի դիմաց: Վերջինս նրան տվեց վաթսուն հազար դիրհամ եւ վերցրեց բերդը, որ ցայժմ նրանց ձեռքին էր եւ մեծ տառապանք էր պատճառում մուսուլմաններին»¹¹: Այս պատմությունը վերապատմում է նաեւ ալ-Ջահաբին, միայն թե գրում է, որ բերդը 100 հզ. դիրհամով «Սաի տիրոջ» համար գնել է Հուլադուն, որից հետո Հեթումն իր հնազանդությունն է

¹⁰ 'Izz al-Dīn ibn Šaddād, Al-A'laq al-ḥaṭira fī ḍikr umarā' al-Šām wa-l-Ġazīra, ǧ. 1.2, bi-taḥqīq Yaḥyā Zakarīyā 'Abbāra, Dimašq, 1991, ǧ. 118-119.

¹¹ Stiu al-Ġazārī, Tārīḥ Ḥawādīṭ al-zamān wa-anbā'uhu wa-wafayāt al-akābir wa-l-a'yān min abnā'ihī al-ma'rūf bi-tārīḥ ibn al-Ġazārī, ǧ. 1, bi-taḥqīq 'Umar 'Abd al-Salām Tadmūrī, al-Maṭba'a al-'Ašriyya, Šayda-Bayrūt, 1999, ǧ. 149: Հմմտ. al-Dahabī, Al-Muḥtār min tārīḥ ibn al-Ġazārī, bi-taḥqīq Ḥaḍir 'Abbās Muḥammad Ḥalīfat al-Munšadāwī, Dār al-Kitāb al-'Arabī, Bayrūt, 1988, ǧ. 358: Mufaḍḍal ibn Abī al-Fadā'il, al-Nahḡ as-sadid wa-durr al-farid fīmā ba'da tārīḥ ibn al-'Amīd (Moufazzal ibn Abil-Fazail, Histoire des sultans mamlouks, Texte Arabe publié et traduit en Français par E. Blochet, Patrologia Orientalis, t. 14, Paris, 1920, ǧ. 558 [p. 394]. al-Nuwayrī, Nihāyat al-arab fī funūn al-adab, ǧ. 31, bi-taḥqīq Naḡīb Mušṭafā Fawwāz, Hikmat Kišlī Fawwāz, Ibrāhīm Šams al-Dīn (u wjng), Dār al-Kutub al-'Ilmiyya, Bayrūt, 2004, ǧ. 157. Ibn al-Dawādārī, Kanz al-durar wa-ḡami' al-ḡurar, ǧ. 8, bi-taḥqīq Ūlriḥ Ḥarmān, al-Qāhira, 1971, ǧ. 341. Ibn al-Furāt, Tārīḥ al-duwal wa-l-mulūk, ǧ. 8, bi-taḥqīq Quṣṭanṭīn Zurayq wa-'Izz al-Dīn Naḡla, Bayrūt, 1939, ǧ. 155-156:

Հայտնել նրան¹²: Բերդին տիրելու՝ մյուս պատմիչներից տարբերվող մեկ այլ պատմություն է տալիս ալ-Այնին: Նա մասնավորապես գրում է. «Այն [նախկինում] Հալեպի տարածքների մաս էր, պատկանում էր մուսուլմաններին, եւ նրա վրա իշխողը Հալեպի տեր ալ-Մալիք ալ-Նասիրն էր: Այդպես էր, քանի դեռ Հուլավուն չէր մտել Հալեպ եւ գրավել բոլոր երկրները: Երբ թաքֆուրը՝ Սաի տերը, իմացավ, որ Հուլավուն այն [նույնպես] գրավել է, նրա մոտ գնաց եւ նվերներով շողոքորթեց, գումար տարավ նրան՝ խնդրելով, որ Բեհսնան իրենը լինի, եւ նա էլ հանձնեց նրան»¹³:

1262 թ. Թորոս Ռոսլինի ձեռքով գրված մի ձեռագրի հիշատակարանից տեղեկանում ենք, որ Հեթումը մի շարք բերդեր է խլել նաեւ Ռումի սուլթանությունից: «Այլեւ բարեպաշտութեամբն իւրով յԱստուած զորացեալ հէրքեր զհոյս հաքարածին ծննդոցն եւ անաւրինաց սեռիցն, բազում անգամ յաղթեալ սուլտանին Հոռոմոց, եւ առեալ զամուրս նորա՝ զանմատչելին Մունտաս, եւ զՄանիաւնն, զըՍիկի եւ զայլս բազում զոր ոչ է այժմ ասել մի ըստ միոջէ: Որ եւ յայսմ ամի առ նա եւ զամուր գղեակն զհոյակապ եւ զյգանաւորն Պեհսնի, որ աւր Ի եւ Ե (25) էր ամսէանն հոգտեմբերի»¹⁴: Ստացվում է՝ Բեհսնին գրավվել է 1262 թ. հոկտեմբերի 25-ին:

Մարաշից եւ Բեհսնիից բացի հայոց թագավորությունն են անցել նաեւ Ռաբանը, Քեսուկը, Դարպսակը, Մարզուբանը (Մարզաբան), Շիհ ալ-Հադիդը¹⁵: Ըստ Իզզ ալ-Դին իբն Շադդադի՝ եւս մեկ բերդ՝ Բուրջ ալ-Ռասսասը, մինչեւ թաթարների արշավանքը գտնվում էր «Նասիրյան պետություն» (իմա՝ Հալեպի սուլթան ալ-Նասիր Յուսուֆի տիրություն)

¹² Sūn al-Dahabī, Tārīḥ al-Islām wa-wafayāt al-mašāhir wa-l-a'lām, ǧ. 52, bi-taḥqīq 'Umar 'Abd al-Salām Tadmūrī, Dār al-kitāb al-'arabī, Bayrūt, ǧ. 22, ինչպես նաեւ նույնի՝ Duwal al-Islām, ǧ. 2, bi-taḥqīq Ḥasan Ismā'il Marwa, Dār Ṣādir, Bayrūt, 1999, ǧ. 218: Հմմտ. Ibn Tagrī Birdī, Al-Manhal al-ṣāfi wa-l-Mustawfi ba'da al-Wāfi, ǧ. 5., bi-taḥqīq Muḥammad Muḥammad 'Amin, al-Hay'a al-Miṣriyya al-'amma li-l-Kitāb, al-Qāhira, ǧ. 275:

¹³ Al-'Aynī, 'Iqd al-ǧumān fī tārīḥ ahl al-zamān, ǧ. 3, bi-taḥqīq Muḥammad Muḥammad 'Amin, al-Hay'a al-miṣriyya al-'ama li-l-kitāb, al-Qāhira, ǧ. 151-152.

¹⁴ Sūn ՀԶՀ, ԺԳ. դար, էջ 317: Հմմտ. «Մմբատայ Սպարապետի Տարեգիրք», աշխատասիրությունը Հ. Սերովի՝ Ազրլեանի, Վենետիկ, 1956, էջ 234-235 (պատմում է Մունդաս բերդի գրավման հանգամանքների մասին). «Մանր ժամանակագրություններ XIII-XVIII դդ.», կազմեց Վ. Ա. Հակոբյան, Կ. Ս., Երևան, 1951, էջ 82. նույնի՝ Կ. Ս., Երևան, 1956, էջ 71 եւ Կ. Մաթևոսյան, Հեթում Պատմիչ Կողիկոսցին եւ նրա ժամանակագրությունը, Երևան, 2011, էջ 53, ինչպես նաեւ «Սամուէլ Անեցի եւ շարունակողներ, ժամանակագրություն», աշխատասիրությունը Կ. Մաթևոսյանի, Երևան, 2014, էջ 251:

¹⁵ Sūn 'Izz al-Dīn ibn Ṣaddād, Al-A'lāq al-ḥaṭira, ǧ. 1.2, ǧ. 115, 421, 434 եւ հմմտ. Ibn al-Šiḥna, Al-Durr al-muntaḥab, ǧ. 171, 223, 226:

կազմում: Ասորիքի գերավման ժամանակ այն ավերվել է, եւ նրան հարակից մի շարք գյուղեր անցել են հայերի ձեռքը¹⁶:

Այս նվաճումներով հայկական պետությունն սահմանները, փաստորեն, կարճ ժամանակով ընդարձակվեցին՝ ընդհուպ մինչեւ Եփրատ գետը: Հայոց հայրապետական աթոռը՝ Հռոմկլան, ըստ այդմ, առաջին անգամ աշխարհագրորեն միացավ Կիլիկիո հայոց թագավորությանը¹⁷: Այնուամենայնիվ, Հուլաղուի նահանջից հետո նույն այդ հայ-մոնղոլական դաշնակցությունը մեկընդմիջտ սեպ դարձավ հայ-մամլուքյան հարաբերություններում եւ վերահաս սպառնալիք՝ հայոց թագավորության համար: Ալ-Ումարին, թեեւ այս դեպքերից 70-80 տարի անց է գրում, այնուամենայնիվ, հայ-մոնղոլական դաշնակցության պատճառով հայերին հայտարարում է. «Իսլամի ամենավտանգավոր թշնամիներ» (ahbat^c udwin li-l-Islām)¹⁸, որոնց վրա «Հուլաղույան տան (հարստության) արքաները մեծ ուժ եւ ազդեցություն ունենին, մինչեւ որ նվաղեց նրանց ուժը, թուլացավ դաժանությունը, նրանց (հայերի) անտառը դատարկվեց նրանց առյուծներից»¹⁹:

Հեթումը չբավարարվեց հիշյալ տարածքային ձեռքբերումներով եւ փորձեց առավելագույնս օգուտ քաղել ստեղծված պատեհ քաղաքական իրավիճակից: Նա 1262-1264 թթ. ընթացքում մի քանի անհաջող արշավանք ձեռնարկեց Հյուսիսային Ասորիքի բնակավայրերի դեմ (Մաարրաթ Միսրին, ալ-Ֆուա, Սարմին, Ջաբալ Լայլուն, Այնթաբ եւ այլն): Մամլուքյան իշխանությունների պատասխանը շատ չուշացավ: Արդեն 1266 թ. սուլթան Բայբարս ալ-Բուռդուկտարին (կառ. 1260-1277 թթ.) առաջին լուրջ հարվածը հասցրեց Կիլիկյան Հայաստանին: Այդ արշավանքն աղետալի հետեւանքներ ունեցավ հայոց թագավորության համար՝ երկրի համատարած ավերածությունից բացի պատճառ դառնալով նաեւ հայոց գահաժառանգ Լեւոնի եւ մի շարք այլ ազնվականների գերեվարության համար: Որդուն ցանկացած գնով գերությունից ազատելու՝ Հեթումի դիվանագիտական ջանքերը որոշ պտուղներ տվեցին : Ի վերջո, 1268 թ. Անտիոքում կնքված հաշտության պայմանագրով Հեթումը պարտավորվեց

¹⁶ Slū 'Izz al-Dīn ibn Šaddād, Al-A'laq al-ḥaṭira, ց. 1.2, ք. 103:

¹⁷ Slū K. Raphael, Muslim Fortresses in the Levant: Between Crusaders and Mongols, London-New York, 2011, p. 186, ինչպես նաեւ Գ. Դանիելյան, Հռոմկլայի կաթողիկոսական աթոռի պատմության արաբական սկզբնաղբյուրները, Կիլիկյան Հայաստանը սահմանակից պետական միավորների ընկալումներում (պատմաբանասիրական ակնարկներ), Ա. Բոգոյան, Ռ. Շուքրյով, Վ. Տեր-Ղևոնդյան, Գ. Դանիելյան, Երևան, 2016, էջ 244-245:

¹⁸ Al-'Umāri, al-Ta'rif bi-l-muṣṭalaḥ al-šarif, bi-taḥqīq Muḥammad Ḥusayn Šams al-Dīn, Dār al-kutub al-'ilmiyya, Bayrūt, 1988, ք. 82.

¹⁹ Նույն տեղում:

որպես փրկագին սուլթան Բայբարսին հանձնել վերջինիս շատ մտերիմ մի մամլուքի՝ Սունկուր ալ-Աշկար անունով, որին մեծ դժվարությամբ ազատել էր մոնղոլական գերությունից, ինչպես նաեւ զիջել բոլոր այն բերդերը, որոնց 1260-1262 թվականների ընթացքում տիրացել էր մոնղոլների օգնությամբ²⁰:

Այսպիսով, մոնղոլների շնորհիվ 1260-1262 թթ. ձեռք բերված տարածքային նվաճումների մեծ մասը ժամանակավոր դուրս եկան, եւ 1268 թ. կրկին վերագարձվեցին մամլուքներին: Հատկանշական է, որ այս զիջումներով հայոց կաթողիկոսների նստավայր Հռոմկլան կրկին հայտնվեց Կիլիկյան Հայաստանից մեկուսացված վիճակում: Ամենացավալին, իհարկե, հայոց թագավորության կրած մարդկային կորուստներն էին, իսկ առեւտրատնտեսական «վերքերը» բուժելու եւ ավերված քաղաքները վերականգնելու համար երկիրը դեռ ուժ կգտներ: Առաջին անգամ Կիլիկյան Հայաստանը իրապես զգաց իր գոյության համար Մամլուքյան սուլթանության լուրջ վտանգը. բայց եւ այնպես մոնղոլների եւ արեւմտյան երկրների հետ գործակցությունը դեռ պիտի շարունակվեր:

РЕЗЮМЕ

Царь Киликийской Армении Хетум I (1226-1269) в 1258 г. занял город Мараш, находившийся до этого во власти Иконийских султанов. Но основная часть городов и крепостей, включенных в состав Киликийской Армении, принадлежала Эйюбидам и перешла к Хетуму I в результате похода монголов в 1260 г. под предводительством Хулагу. К Киликийской Армении - союзнику монголов, перешли Бехесни, Тил Хамдун, Рабан, Кесун, Дарбсак, Марзубан, Ших ал-Хадид, Бурдж аль-Рассас и др. По существу в 1260-1262 гг. вся Приевфратская область на короткий промежуток времени (1260-1268) перешла к Хетуму I. Однако большая часть этих территорий была утрачена вследствие нашествия мамлюкского султана Байбарса в 1266 г. и подписания армяно-мамлюкского соглашения 1268 г. В статье рассматриваются ценные сведения о вышеупомянутых событиях, найденные в трудах средневековых авторов XIII-XV вв.

²⁰ Հերոմին, այնուամենայնիվ, հաջողվել է պահպանել Բեհեսնին: Մամլուքյան պատմիչների հաղորդմամբ՝ մինչև Սունկուր ալ-Աշկարին Բայբարսի մոտ ուղարկելը հայոց արքան խնդրել էր նրան Կափիրե հասնելուն պես համոզել սուլթանին, որ Բեհեսնին թողնի Կիլիկյան Հայաստանին: Սունկուր ալ-Աշկարը հավատարիմ է մնացել իր խոստմանը, իսկ սուլթան Բայբարսը վերջինիս խնդրանքը չի մերժել: Վերոհիշյալ դեպքերի մասին մանրամասն տե՛ս Գ. Դանիելյան, Ալ-Մակրիզիի Kitāb al-sulūk երկը Կիլիկյան Հայաստանի 1250-1310 թթ. պատմության սկզբնաղբյուր (աղբյուրագիտական քննություն), թեկնածուական ատենախոսություն (անտիպ), Երևան, 2015, էջ 118-149:

SUMMARY

In 1258, King Hethum I (1226-1269) of Cilician Armenia captured Mar'aš, which was in the dominion of the sultans of Iconium. However, most of the towns and fortresses in Cilician Armenia belonged to the Ayyubids and passed to Hethum I as a result of the campaign of Hulaghu in 1260. Bahasnā, Tall Ḥamdūn, Ra'bān, Kesoun, Darbsāk, al-Marzabān, Ših al-Ḥadīd, Burj al-Rassas etc. passed to Cilician Armenia as to an ally of the Mongols. In fact, in 1260-1262 the former Euphratisia province passed to Hethum I for a short period of time (1260-1268). However, the major part of it was lost as a result of the campaign of the Mamluk sultan Baybars in 1266 and the signing of the Armenian-Mamluk agreement in 1268. In this article rich evidences about the historical sources of the 13th-15th cc. on the above-mentioned events are considered and examined.

